

## ◎ 十種智

《三藏法數》——出《華嚴經》

十種智者，即三世諸佛一切種智也。如來為令一切菩薩，應當修學而自得開解也。

一、三世智。謂於過去、現在、未來三世之法，皆悉通達，圓明顯了，是名三世智。

二、佛法智。佛，梵語具云佛陀，華言覺。謂覺法自性，善出世間，現諸威儀，說法度生，是名佛法智。

三、法界無礙智。謂知一切眾生，本具法界之體，事理融通，性分交徹，互不相礙，是名法界無礙智。

\* 性，即理也。分，謂分限，即事也。

四、法界無邊智。謂知眾生色心諸法，即是法界，充遍一切世間，無有邊際，是名法界無邊智。

五、充滿一切世界智。謂如來從定而起廣大妙用，遍滿世間，無不照了，是名充滿一切世界智。

六、普照一切世間智。謂如來有大智慧光明，普能照了無量世界，是名普照一切世間智。

七、住持一切世界智。謂如來有大神力，住持世界，知諸眾生機器大小而攝化之，是名住持一切世界智。

八、知一切眾生智。謂如來知所化一切眾生，善惡因緣，皆悉明了，是名知一切眾生智。

九、知一切法智。謂如來既知所化眾生，亦復了知能化諸法，是名知一切法智。

十、知無邊諸佛智。謂如來知無邊諸佛，出現世間，說法教化一切眾生之事，悉能明了，是名知無邊諸佛智。